

四庫全書

子部

欽定四庫全書

古今姓氏書辨證卷二十 宋 鄧名世 撰

二十二覃

覃

今人音尋後漢淩中蠻覃兒健澧中蠻覃戎唐將王
翊擒西原賊帥覃問宋章惇安撫湖北平州蠻覃文
猛漢賜州蠻覃彥以地內附

譚

出自周畿內諸侯譚子之後春秋魯莊公時齊桓公滅之子孫以國為氏晉吏部郎謝朓知選時有姓譚者乞官朓曰齊侯滅譚那得有卿對曰譚子奔莒所以有僕人以為佳對漢末太原譚賢守節不仕王莽賢字伯升又唐人譚正夫

南

出自子姓成湯八世孫盤庚妃姜氏夢赤龍入懷因孕十二月而生子手把南字長荊州因號南赤龍生

子條條孫仲為紂將平獫狁之難宮括為周文王臣
封南陽侯宮括生邵為成王大司馬封白水侯邵生
宮宣王時為南陽侯又宮生伯莊王時為上大夫春
秋時有周大夫南季聘魯宜為宮之子伯之父兄其
後魯有南蒯南遺漢有南季傳西京曹元禮算術唐
肅宗時給事中南巨川望出河東開府儀同三司南

霽雲望出魏郡頓丘霽雲生涪州刺史承嗣

按辨證于東姓

云中國有東西南北高麗有北氏必其先皆以方為氏而此條所引並不言方蓋以姓纂誤為辨證也今

仍舊
本

男

謹按周初有定州偽將男在貴江南人是男為人姓
而姓書未收也今增入

堪

出自高辛氏才子八元其一曰仲堪子孫以王父字
為氏

南郭

出自齊大夫居國之南郭因氏焉春秋時齊大夫南郭偃會晉而逃歸又景公子鉏奔魯亦謂之南郭鉏于莊子時有南郭子綦生八子名九方歆相之

南宮

其先有食邑南宮者以邑為氏唐冀州南宮縣即其地也春秋時宋大夫有南宮長萬生南宮牛又魯孟獻子生閱一名緇字适謂之南宮敬叔

按孔子弟子氏南宮者曰

括曰适曰緇曰說曰閱皆字子容而名有五明夏宏基輯孔門弟子傳畧以南宮适括緇字子容為一人

以仲孫閱說字南宮敬叔者為一人朱彛尊曰致春秋名號歸一圖有仲孫閱即南宮敬叔而不及括緇則夏說似可從史記索隱家語世本說苑諸書說雖不一然古今人表既有南宮又有南宮敬叔師古注於南宮則云南宮緇於敬叔則名南宮适是孔門弟子之列有二南宮已皎然矣又考閱乃僖子之子則作獻子之子必以所居為稱非南宮氏舊說文王臣南子亦悞

宮适亦非複姓

南史

出自齊大夫居國之南以居為氏謂之南史氏春秋齊崔杼弑莊公南史氏聞太史盡死執簡以往將書

崔杼罪者即其家也

南鄉

晉國高士全隱於南鄉因以為氏後漢羽林太監南鄉槐

南榮

姓源韻譜曰古有善曝背於南榮者獻之於君因以為氏

二十三談

談

六國時有談生蜀錄云石季龍有將軍談元唐太宗時嶺南酋長馮盎談殿迭相攻擊其後望出吳郡今望出梁國廣平

郟

音談

出自嬴姓少昊氏之後封國於郟春秋時郟子朝魯能言少昊氏以鳥名官魯女嫁郟謂之郟伯姬其後國亡子孫以國為氏而世居沛

甘

姬姓周惠王少子太叔帶食采於甘謂之甘昭公生
成公成公生簡公及悼公甘過成公孫平公鮑鮑生
桓公又有甘歆敗戎于邠垂及甘大夫襄皆其族唐
時望出洹水丹陽長樂富水

嫫

姓苑音甘

儋

耽音

出自姬姓周簡王少子曰儋季以字為氏季生活又
有儋翩皆為周大夫

聃

音耽

出自姬姓周文王少子載字季為成王大司空封國
於聃謂之聃季後以國為氏仕周為大夫春秋時尹
氏訟聃啟于晉是也聃一作耽又鬪章囚鄭聃伯鄧
有聃甥

澹臺

孔子弟子澹臺滅明字子羽魯國武城人裔孫伯恭
為漢博士會稽人

甘先

出姓解

甘莊

出姓解

三州

元和姓纂曰三州孝子之後亦單姓州

三飯

元和姓纂曰繚適蔡干適楚缺適秦後皆氏焉

三仇

元和姓纂曰宋子姓微子之後

三種

出姓苑云人複姓

二十四鹽

鹽

魯國先賢傳有鹽津為北海相因居之

閻

出自姬姓昭王少子生而有文在其手曰閻康王封於閻城晉滅閻子孫散處河洛前漢末居滎陽尚書閻暢侍中北宜春侯三子顯景晏顯車騎將軍長社侯顯生穆避難徙於巴西之安漢顯孫甫魏武帝封為平樂鄉侯復居河南新安生牂牁太守璞璞生晉殿中將軍漢中太守讚讚生遼西太守亨亨生北平

太守安成亭侯鼎字玉鉉死劉聰之難子昌奔于代
王猗廬遂居馬邑孫滿後魏諸曹大夫自馬邑徙河
南滿孫善龍驥將軍雲中鎮將因居雲州盛樂生車
騎大將軍燉煌鎮都大將提提生盛樂郡守進進少
子慶字仁度後秦天水閭遵為姚萇大將軍掾又有
越騎校尉閻生征南主簿閻恢後蜀李特以晉始昌
令巴西閻式為謀主後涼有祁連都尉閻襲又呂隆
遣母弟愛子文武舊臣閻松等五十餘家質于長安

唐貞觀所定太原郡十姓有閻氏

廉

孔子弟子廉潔字子庸衛人趙相信平君廉頗後居
趙郡漢興以豪宗自苦陘徙京兆杜陵或居隴西襄
武世為邊郡守後秦有侍御史廉桃生

詹

謹按元和姓纂曰詹尹之後誤矣

按詹氏周有詹父詹桓伯云出自周

宣王支子封為詹侯晉有詹嘉說有詹父鄭有詹伯俱在詹尹之先姓纂之說固未該括名世辯其

誤而不詳所自
出今擬增入

占

出自媯姓陳公子完裔孫書字子占後人以字為氏

苦

出自魯家臣苦夷字越生子曰陽州

淹

近世豫章人有此姓不知其所自出

潛

宋有潛友成登進士第

黔

齊隱士黔敖之後後漢劉永傳有方與人黔陵斬逢
萌封關內侯

鍼

針音

出自媯姓陳僖公之孫鍼子以所食邑為氏其孫莊
子為衛大夫八世孫宜臼奔楚為箴尹

瞻葛

英賢傳曰有熊氏之後世本宋景公有大夫瞻葛祁
其後齊人語訛以瞻葛為諸葛

鍼巫

魯大夫鍼巫氏莊公三十二年使叔牙待命于其家
使鍼季酖之是也姓書云鍼巫或去邑為鍼氏蓋指
鍼季言之

黔婁

劉向列女傳有黔婁先生古賢者謹按揚子法言曰

顏淵黥婁似其人黥姓婁名未知姓纂何據以為複姓

箱耳

箱亦作鉗西羌複姓也狀云周王季後為虔仁氏音訛為箱耳魏太師宇文泰遣安州長史鉗耳康買使于王琳唐明皇遣哥舒翰守潼關以箱耳大福為屬將又隋恒山郡九門縣令鉗耳君清德之頌云君名文徹華陰朝邑人本周王子晉之後避地西戎世為

君長因以地為姓曾祖靜仕魏為馮翊太守祖郎成
集二州刺史父康周荆安寧鄧四州總管別駕安陸
龍門二郡守大業六年建碑

二十五添

謙

乞伏熾盤以鎮南將軍謙屯為都督河右諸軍事又
以涼州刺史謙屯為鎮軍大將軍河州牧

兼

姓源韻譜曰衛公子兼之後氏焉

二十六咸

咸

出自商賢相巫咸之後以字為氏唐開元殿中侍御
史咸廣業世居東海臨朐

函

音含

姓苑漢有豫章太守函熙謹按周官攻皮之工有函
人為甲者或以世官為氏

咸丘

自魯大夫食邑咸丘因以為氏其地高平鉅野縣東
咸亭是也

函輿

元和姓纂曰晉范皋夷食采函輿因氏焉

函洽

姓苑有此氏今詳洽洽二字相似未必非函洽氏字
畫訛也

二十八嚴

嚴

三國時魏有嚴顏後秦有吏部郎嚴康後蜀李特以
嚴怪為謀主後涼祁連都尉嚴純

二十九凡

凡閭

姓苑云唐叔之後今東莞多此姓

欽定四庫全書

卷二十

欽定四庫全書

古今姓氏書辨證卷二十一

宋 鄧名世 撰

上聲

一董

董

出自己姓黃帝之後封國於颺其君叔安者有嫡子
曰董父學擾龍以事帝舜賜姓曰董為豢龍氏其後
有驪夷氏至周太史辛有之二子適晉與孫伯厲共

司晉典籍以其董督晉史又為董氏春秋傳云晉有董史是也晉文公時有大夫董因後有良史董狐大夫董叔趙氏臣董安于其後有董子名無心著書難墨子又項羽封將董翳為翟王都高奴翳孫遂居隴西漢高祖功臣表有成欽侯董濞傳國四世武帝功臣有散侯董金吾以匈奴都尉降于安漢孫賢皆嗣侯是時匈奴無董姓必中國人陷虜而歸者後漢陳留人屯田都尉董禮娶蔡琰女公孫述時牂牁大姓

董氏保境為漢被褒賞西羌殺漢中太守董炳後蜀
李班以隴西董融為賓友又有太師董皎後涼呂光
以隴西董光為軍佐以討西域後燕有博士董謚南
燕有尚書令董銳唐元和有荆南從事董佺字庶中
有武陵集范陽董秦檢校司空平章事唐中書門下
平章事董晉河東人又松外蠻數十姓趙楊李董為
貴族

孔

謹按春秋時衛有孔氏出自姑姓仕衛為大夫孔嬰齊後有莊叔孔達成子孔烝鉏生頃叔孔羈羈生孔文子孔圉圉子孔悝字叔陳孔氏出自媯姓公孫寧謂之孔寧寧之後有孔奐鄭孔氏有孔叔孔將鉏不知其所出又穆公子嘉之後有孔氏今依元和姓纂分為子孔氏不列於此

孔父

元和姓纂曰微子之後宋大司馬孔父嘉亦為孔氏

二腫

隴

姓苑曰宣城人

奉

出姓苑謹按後漢獨行戴就傳光祿奉盼上就為主

事

勇

出姓苑

拱

今撫州臨川民有此姓不詳所自出

三講

項

出自古諸侯項國其地汝陰項縣今項城是也魯僖公十七年滅項取其地楚考烈王滅魯封其將於項因以為氏西京雜記有項瑄及其子陸傳曹元理算術於南季三輔決錄安陵項仲山每飲馬渭水常投

三錢唐江東人項斯字子遷能詩楊祭酒詩云平生
不解藏人善到處逢人說項斯會昌中為丹徒尉

四紙

紙

河南紙氏後魏官氏志渴侯氏改為紙氏

抵

僧道世撰法苑珠林晉有抵世常中山人謹按姓書
未有此氏今增入

氏

宋有起居郎氏居方河中府虞鄉令氏昭度

委

周禮有委人掌斂甸稍芻薪之賦以其委積後以世官為氏漢有太原太守委進

蛾

音蛾

晉大夫蛾析見左傳姓源韻譜以為音俄誤矣

為

音委

出自芊姓楚公族大夫食邑於蒍因以為氏左傳僖

二十七年子玉治兵於蒍即其地也春秋時蒍呂臣

字叔伯生賈字伯嬴賈生蒍艾獵一名教字孫叔孫

叔從孫子憑生掩為大司馬自呂臣至子憑四人皆

為令尹故蒍氏世為楚大夫

按左傳桓公六年楚武王侵隨使遽章求成馬

而唐書世系表云蚡冒生蒍章然則遽蒍字同而遽章為蒍氏之始辭正謂蒍呂臣生蒍賈以僖公二十七年傳有蒍賈尚幼之文遂意為呂臣之子世本及杜預注皆未詳其系也蒍艾獵即孫叔敖為蒍賈之子服虔杜預之說同蒍子馮世本為蒍艾獵之子杜預為蒍艾獵之從子說不同辭證所引世次井然以

為祖稱或
出聽說

東周時周大夫子國食邑於蔿謂之蔿國
然不以為氏元和姓纂曰士蔿之後誤矣蔿為晉大
夫姓士氏

闕

音
委

集韻廣韻皆曰人姓今存之然已誤矣姓源韻譜曰
國語有闕大夫誤矣國語無此人謹按魯語曰公父
文伯之母季康子之從祖母也康子往馬闕門與之
語注闕闕也門寢也此謂婦人能遠嫌爾安得為人

氏乎

遠

音委

出自芊姓楚蚡冒生王子章字發鈞以艸為氏謂之
遠章其後有靈王令尹遠罷字子蕩太宰遠啓疆寢
尹遠射工尹遠固亦曰歲尹周大夫遠洩遠居遠越
皆名顯諸侯或云遠為一也字通於為故子憑及其
子掩亦或以為氏當時史冊互見故別為兩族

為

音委

于委切魯大夫姓左傳魯隱公祭鍾巫館于寯氏是也

觚

丑豕切音褫姓書未有謹按列子古善聽者觚俞今增入

芊

綿婢切出自顓帝生稱稱生卷章卷章生重黎重黎誅弟吳回代為祝融是為火正吳回生陸終陸終生

子六人皆剖拆而產其六曰季連為芊姓楚其後也
季連生附沮附沮生穴熊其後中微或在中國或在
夷狄弗能紀其世周文王時穴熊裔孫鬻熊佐文王
有功成王舉文武勤勞之後得鬻熊孫熊繹封於荆
蠻食以子男之田賜姓芊氏以奉祝融鬻熊之祀國
於丹陽其地南郡枝江是也荆小而僻在深山華路
藍縷以啓山林熊繹生熊艾熊艾生熊黥熊黥生熊
勝熊勝以弟熊揚為後熊揚生熊渠熊渠二子長子

熊毋康早死中子熊摯紅代立其弟執疵弒而代之
號曰熊延熊延生熊勇熊勇以弟熊嚴為後熊嚴四
子伯霜仲雪叔堪季徇長子伯霜代立是為熊霜其
後仲雪死叔堪避亂於濮少弟季徇代立是為熊徇
生熊罾熊罾生熊儀是為若敖楚人以敖為尊稱故
君卒而不成禮以終之者皆謂之敖若敖生熊坎是
為霄敖霄敖生熊昫是為蚡冒蚡冒弟熊通弒而代
立僭號楚武王武王生文王熊疵始都郢文王生熊

豳是為堵敖其弟熊頤弑之而代立是為成王生太子商臣及王子職商臣弑成王自立為穆王穆王生莊王熊旅莊王生共王熊審共王無嫡子有庶子五人招圍比黑肱棄疾招立為康王生邲教員邲教生慕及平夏公子圍弑其父子而自立是為靈王熊虔熊虔生太子祿公子罷敵靈王死於乾谿公子比殺其二子而自立比字子干是為訾敖以其弟黑肱為令尹所謂令尹子皙者也公子棄疾殺子干子皙而

自立更名熊居是為平王平王生建啓壬太子建字
子木費無極譖之奔鄭生白公勝公子啓字子間五
讓不為王平王薨立少子壬是為昭王熊軫昭王賢
而知大道失國而復得之生章及子良章代立為惠
王生簡王中中生聲王當當生悼王熊疑熊疑生肅
王臧及宣王熊良夫良夫生威王熊商商生懷王槐
懷王為秦所詐留死於秦國人立其太子橫為頃襄
王頃襄王生幽王及哀王猶猶庶兄負芻王五年秦

虜之而滅楚以其地為郡縣而楚之子孫仍芊姓漢
藝文志七十子之後有芊子名嬰著書十八篇唐開
元中有隋右衛將軍芊雄曾孫端為金吾司戈謹按
春秋楚王子公子雜見於左傳者令尹子元息公子
朱公子穀臣公子變公子茂令尹子嬰齊字子重司
馬公子側字子反太宰公子辰字子商令尹公子壬
夫字子辛司馬公子午字子庚令尹公子追舒字子
南生棄疾司馬公子魚字子魴司馬公子何忌申公

王子牟左尹公子勝公子丙公子馮公子申公子成
公子平公子罷公子寅公子橐師公子罷戎公子茂
公子宜穀公子格公子畸公子繁公子慶公子寬司
馬公孫何忌凡三十二人皆不知誰之子又令尹公
子申字子西生令尹寧字子國及武城尹公孫朝昭
王兄公子結字子期謂之司馬之期生寬及平而白
公之弟曰王孫燕凡三家七人又史記秦王後宮曰
羊八姓號宣太后其弟曰穰侯魏冉涇陽君葉陽君

皆楚後芊氏

是連

北齊文宣帝有黃門郎是連子暢代北是連氏隨魏南徙孝文太和中改為連氏望出河南

是婁

代北是婁氏後改為河南高氏

是賁

代北是賁氏後改為河南封氏

是人

姓解曰北齊方技傳由吾道榮學於是人氏

案北齊方技傳

由吾道榮少好道法聞晉陽人某明算術乃尋是人為其家傭力以學道則是人乃此人非姓也此誤

是云

西魏有開封是云實

是奴

代北是奴氏後改為是氏

倚相

楚左史倚相之後威王時有倚相季文為士官

五音

比

姓解曰商有少師比干誤矣謹按商姓子氏比干者
王子之名按此則世無比氏合駁去

矢

出姓苑

履

出姓苑

癸

出自姜姓齊癸公之後氏焉

視

出姓苑

壘

後趙有壘澄本姓裴氏後改焉謹按左傳裴音非蓋後世聲轉為匪而又改之也

水丘

漢酷吏傳薛宣收大姓公孫丹親黨繫獄使門下書
佐水丘岑盡殺之注水丘姓岑名

登北

元和姓纂曰國名也女為舜妃者後為氏

業山海經
舜妃登北

氏一曰登北氏
蓋皆字形之訛

六止

市

戰國策曰燕有將軍市被謹按周官司市之後必以
官為氏

紀

出自姜姓炎帝之後封為紀侯其地東莞劇縣是也
紀侯嘗諧齊哀公于周周烹之春秋魯莊公四年齊
襄公復九世之讎滅紀紀侯義不下齊大去其國君
子善之子孫以國為氏又北燕有尚書紀逵

祀

謹按故事咸平五年十一月賜京城父老祀道巖爵
公士道巖百十九歲率父老百五十四人上尊號上
嘆其壽考故獎之或云祝道巖也

似

後魏官氏志似先氏改為似氏

已

出自黃帝子得姓者十四人而青陽夷鼓同為已姓
青陽少昊氏也夏諸侯有蘇氏周諸侯有郟子皆其

後有蘇氏女女於紂謂之妲己

妲己

出自黃帝子昌意其後曰顓帝生崇伯鮌鮌生伯禹
為堯司空宅舜百揆舜薦之於天者十有七年終踐
天子之位周王子晉論其功曰伯禹釐改制量象物
天地比類百則儀之于民而度之于羣生故天無伏
陰地無散陽水無沉氣火無災燁神無間行民無淫
心時無逆數物無害生皇天嘉之祚以天下賜姓曰

姒氏曰有夏謂其能以嘉祉盛富生物也韋昭注曰
姒猶祉也禹為夏后氏生帝啓啓生太康仲康仲康
生相相生少康少康生帝子帝槐帝槐生芒芒生泄
泄生帝不降帝扃扃生厘厘崩立帝不降之子孔甲
孔甲生皐皐生帝發發生履癸是為桀桀無道成湯
放之於南巢夏絕不祀至周武王克商下車而求禹
後得東樓公封之於杞杞自東樓公已降世系皆具
史記生成公及桓公姑容姑容生孝公丐文公益姑

平公郁釐郁釐生悼公成成生隱公乞僖公過過生
湣公皆與諸侯會盟桓公成公之弟以魯僖公二十
四年即位襄公六年卒在位七十年春秋時諸侯享
年久長未有如杞桓公者又夏后少康庶子封於會
稽自號於越越子允常及其子越王句踐句踐太子
適郢及鄆沈二國之君亦見於春秋皆姒姓又左傳
載少昊子臺駘封諸汾川沈如蓍黃實守其祀者姒
乃國名非姓也

史

周太史佚之後以官為氏鮒字子魚其族朝生文子
狗皆仕衛為大夫漢魯國史恭生高玄高大司馬樂
陵安侯二子術丹丹左將軍武陽頃侯孫均均子崇
自杜陵受封漂陽侯遂為郡人崇裔孫宋樂鄉令史
瓌瓌七世孫務滋相唐武后生清河令惟肖是為宣
城史氏又丹裔孫後漢歸義侯苞晉永嘉亂避地河
西建康是為建康史氏又有高容史氏京兆史氏皆

丹後而京兆有隋太平公萬歲陳留考城史氏漢京
兆尹敞之後河南史氏本代北阿史那氏改焉又後
漢漢陽太守史充領護羌校尉後涼呂隆以文武舊
臣史難等五十餘家質於長安南涼祠部郎中史嵩
為文武之秀傑

使

師古曰使姓也字或作史事見下平聲二僊便氏

李

出自嬴姓顓帝高陽氏生大業大業生女華女華生
臯陶字庭堅為堯大理生益益生思成歷虞夏商世
為大理以官命族為理氏至紂之時理微字德靈為
翼隸中吳伯以直道不容於紂得罪而死其妻陳國
契和氏與子利正逃難於伊侯之墟食木子得全遂
改理為李氏利正亦娶契和氏女生昌祖為陳大夫
家於苦縣五世孫乾字元果為周上御大夫娶益壽
氏女嬰敷生耳字伯陽一字聃周平王時為太史著

道德經八十一章唐明皇用方士說尊為聖祖混元
上德皇帝伯陽後有李宗字尊祖魏封於段為干木
大夫一云伯陽子宗仕魏封於段干生同趙相允生
躋趙安陽君二子曰雲曰恪恪生洪字道宏秦太子
太傅生興族字育神一名汪秦將軍生曇字季遠趙
柏人侯入秦為御史大夫葬柏人西生四子崇辯昭
璣崇為隴西房璣為趙郡房崇字伯祐隴西南鄭公
二子長曰平燕次曰瑤字內德南郡守狄道侯生信

字有成大將軍隴西侯信生超一名伉字仁高漢大將軍漁陽太守二子長曰元曠侍中次曰仲翔河東太守征西將軍討叛羌于素昌戰沒贈太尉葬隴西狄道東川因家焉生伯考隴西河東二郡太守生向成紀令因居成紀弟尚范陽房始祖也尚生廣前將軍猿臂善射才氣天下無雙匈奴畏之號飛將軍三子長當戶生陵字少卿降匈奴者次曰椒次曰敢字幼卿郎中令關內侯生禹忠忠頓丘房始祖也禹字

子通生丞公河南太守生先字敬宗蜀郡北平太守
生長宗字伯禮漁陽丞生君況字叔干一字子期太中
大夫生本字上明侍御史生次公字仲君巴郡太守西
夷校尉弟恬渤海房始祖也次公生軌字文逸魏臨
淮太守司農卿弟潛申公房始祖也軌生隆字彥緒
長安令積弩生艾字世績晉驍衛將軍衛郡太守生
雍字雋熙濟北東莞二郡太守二子長曰倫丹楊房
始祖也次曰柔字德遠北地太守雍孫蓋安邑房始

祖也柔生弇字季子前涼天水太守武衛將軍安西
亭侯生祖字仲堅涼太子侍講生暉字元盛西涼武
昭王興聖皇帝十子譚歆讓愔恂翻豫宏眺亮愔鎮
遠將軍房始祖也其曾孫系平涼房始祖也翻孫三
人曰丞姑臧房始祖也曰茂燉煌房始祖也曰冲僕
射房始祖也曾孫曰成禮絳郡房始祖也豫玄孫曰
剛武陵房始祖也歆字士業西涼後主八子勗紹重
耳宏之崇明崇產崇庸崇祐重耳字景順以國亡奔

宋為汝南太守後魏克豫州以地歸之拜弘農太守
復為宋將薛安都所陷後魏安南將軍豫州刺史生
獻祖宣皇帝熙字孟良後魏金門鎮將生懿祖光皇
帝諱天錫字德真三子長曰起頭長安侯生達摩後
周羽林監太子洗馬長安伯其後無聞次曰太祖次
曰乞豆後魏定州刺史房太祖景皇帝虎字文彬後
周柱國大將軍唐國襄公八子長曰延伯生於東山
其後太祖入關延伯仕北齊為散騎常侍武德四年

追封南陽伯附屬籍貞觀初罷之與姑臧絳郡武陽
公三房號四公子房至開元二十三年復附屬籍曰
南陽公房屬籍曰蔡王房譙王房畢王房雍王房郇
王房大鄭王房蔡王房蔡王蔚周朔州總管襄武縣
公生西平懷王安安生平原王瓊霍山王珽襄武郡
王琛河間元王孝恭濟北郡王瑊漢陽王瓌濟南王
折折生廬江王瑗畢王房畢王璋生永安壯王孝基
雍王房雍王繪生長平王贄贄生淮陽王道元淮陽

王道明江夏王道宗郇王禕

案唐宗室世系此郇王禕上宜有郇王房三字

生武陵王伯良長平肅王叔良中山王仲良新興王

德良長樂王幼良叔良曾孫揚州參軍思誨生姦臣

林甫相明皇大鄭王房鄭孝王亮生淮南靖王神通

襄邑恭王神符代祖元皇帝諱曷周安州總管柱國

大將軍唐國仁公四子長高祖次代王澄次蜀王湛

次漢王洪梁王至曾孫而絕蜀王房後為渤海王房

湛生襄城王容兒渤海恭王奉慈高祖神堯大聖大

光孝皇帝二十二子分十五房曰楚王智雲荆王元

景皆無後徐王元興

案唐書元興作元禮

曰徐王房至五世孫

絕韓王元嘉曰韓王房建中元年改為嗣鄆王房元

嘉生訓誼謨謀訥小鄭王元懿曰鄭王房元懿生璿

琰球璿琳璿珩

案唐書高祖子有小鄭王房稱惠鄭王房名元懿生璿等此作韓王元嘉

生懿懿生璿世系不合今照唐書添入

嗣王璿曾孫夷簡相憲宗安德

郡公琳孫勉相德宗霍王元軌號王鳳舒王元名魯

王靈夔皆至五世孫絕道王元慶江王元祥曰道王

房江王房皆至十二世鄧王元裕密王元曉滕王元嬰皆至孫絕太宗文武大聖大廣孝皇帝十四子長曰常山愍王承乾次楚王寬出繼次吳王恪次濮王泰次庶人祐附濮王譜次蜀王愔次蔣王暉次越王真次高宗次紀王慎次江王囂次代王簡次趙王福次曹王明江代趙王皆附曹王譜常山愍王房承乾子郇國公象生適之相明皇吳王房恪生成王千里朗陵王瑋嗣吳王琨琨生信安王瑋嗣吳王祗瑋生

峒嶧峴越國公嶧戶部侍郎峴相肅宗所謂欲粟
賤追李峴者將王房暉十五子越王紀王曹王房皆
多子孫高宗天皇大聖大宏孝皇帝八子燕王忠無
子澤王上金九子許王素節十三子為三房孝恭皇
帝弘無子章懷太子賢為太邠王房次中宗睿宗中
宗皇帝四子節愍太子重俊為湖陽郡王房睿宗皇
帝五子讓皇帝憲房曰寧王房憲生汝南王璉濟陽
王嗣莊嗣寧王琳潁川公珣晉昌公班魏郡公瑄蒼

梧公玠文安公瓘漢中王瑀璉生椿櫟樞稻栳相枵
梗楓樞瑀生楫梢梢生諫議大夫景儉惠莊太子亦
曰申王房惠文太子房亦曰岐王房惠宣太子房亦
曰薛王房名業曾孫知柔相昭宗自明王以後諸王
不出閣不分房子孫闕而不見其可知者明皇二十
一子肅宗十四子代宗二十子德宗十一子順宗二
十二子憲宗二十子穆宗五子敬宗五子文宗二子
武宗五子宣宗十一子懿宗八子僖宗二子昭宗十

七子其封爵名字皆有本傳宗室宰相十一人郇王
房有林甫回大鄭王房有程石福小鄭王房有勉夷
簡宗閔常山王房有適之吳王房有岷惠宣太子房
有知柔凡定著三十九房 隴西李氏出自興聖皇
帝第七子豫字士寧東晉西海太守孫琰之字景珍後
魏侍中文簡公生剛慧剛宜州刺史生充節充信充穎
充節隋朔州刺史武陽公生大通大辯大亮大亮唐右
衛大將軍武陽懿公充穎後周滑州刺史流江公生宣

州刺史義本義本生迥秀字茂實相武后迥秀生俊
黃州刺史姑臧大房出自興聖皇帝第八子翻字士
舉東晉祁連酒泉晉昌三郡太守三子達抗寶懷抗
東萊太守生思穆字叔仁後魏營州刺史樂平宣惠
伯生獎字道休北齊魏州尹廣平侯生瓌黃門郎生
斌散騎侍郎襲樂平侯寶七子承茂輔佐公業冲仁
宗承號姑臧房承字伯業後魏滎陽太守姑臧穆侯
生韶彦虞韃韶字元伯定州刺史姑臧文恭侯生璵

瑾瓚瑾字道瑜後魏通直散騎侍郎文恭侯生椿之
行之椿之子蔓容北齊考功郎中生元儉武卿元儉
生義璿義珙義璋義琛義瑛義琛工部侍郎武卿生
瓚陶令元德元德生義琰義瓘義璿義琰相唐高宗
行之字義通隋唐州下澁郡太守固始縣男生夷道
元道元道秦王學士給事中常州刺史生正基雲將
正基太子舍人生給事中亶字景信亶生秘書監成
裕成裕生揆字端卿相肅宗德宗所謂唐第一人李

揆者生興公次公幼公佐公揆弟懿之生祕書少監
上公上公生太子庶子景素景素生蔚相懿宗諫奉
佛太過者蔚三子涯禮部侍郎洵福建觀察使沆字
明澤雲將尚書右丞生晏晏生顏顏生歸期歸期生
逢吉字虛舟相憲宗承子彥字次仲後魏秦州刺史
生燮爽爽字明德生元相元相五世孫乾昇秦府戶
曹參軍生水部郎中岑岑生虔州刺史舟豪州刺史
丹即以書戒妹事在國史譜者岑弟峯開州刺史丹

陽房晉東莞太守雍長子曰倫五世孫文度西涼安
定太守與族父寶入後魏因居京兆山北文度生權
後魏河秦二州刺史杜縣公生崇義後周雍州大中

正五州刺史武康縣公崇義生詮隋趙郡太守臨汾

襄公詮四世孫樂王

案唐世系表詮生樂王此作四世孫不合

靖客師正

明靖字藥師相太宗尚書右僕射同中書門下平章
政事司徒衛景武公所謂兼資文武出將入相者生
德謩德獎德謩將作少監衛國公靖兄端字藥王梓

州刺史永康公客師右武衛將軍丹陽郡公年九十
猶馳獵人謂之鳥賊孫令問散騎常侍靖五世孫彥
方鳳翔司錄參軍靖叔父傳節司隸州刺史生唐刑
部尚書乾祐乾祐生昭德相武后又漢騎都尉陵降
匈奴裔孫歸魏見於丙殿賜姓曰丙後周信州總管
龍居縣公生明明生繁唐左監門衛大將軍應國公
高祖與之有舊以避世祖名賜姓李氏繁生寬旻寬
奉常正卿隴西公生道廣字太丘相武后四子元綜

元繹元紘元緘元綜屯田郎中荆府長史元繹都水
使者元紘字大綱相明皇所謂南山可移判不可搖
者元緘鄆州刺史隴西李氏後徙京兆者岷州刺
史嵩生洮州刺史思恭思恭生欽左金吾衛大將軍
欽生晟字良器相德宗太尉司徒中書令西平王十
二子愿河中節度使聰光祿寺主簿總太子中允孫
左神武大將軍憑右威衛大將軍恕光祿卿憲嶺南
節度使愬陳許節度使左僕射同平章事平蔡功為

多懿渭南尉聽字正思檢校司徒涼國公生左神武
將軍琢甚右羽林將軍懸嵐州刺史趙郡李氏出自
秦司徒曇次子璣字伯衡秦太傅三子雲牧齊牧趙
相武安君始居趙郡趙納頓弱之間殺牧齊為中山
相亦家焉即中山始祖也牧三子汨宏鮮汨秦中大
夫太子詹事生諒諒生左車仲車左車趙廣武君韓
信北面師事之者生常伯遐遐字伯友漢涿郡守生
岳德文班岳字長卿諫議大夫生秉義秉字世範頴

川太守因徙家焉生翼協敏敏五大夫將軍生謨道
郎謨字道謀臨淮太守生哆華哆字子讓上黨太守
生護元護字鴻默酒泉太守生武昭奮武字昭先東
郡太守太常卿生讚修奕就修字伯游後漢太尉生
諒叔訓季諒字世益趙相生膺字元禮河南尹持風
裁自高從之游者謂之登龍門生瓌瓊瑾字叔瑜
東平相避難復居趙生志恢宣宣字叔興生定臺獎
碩定字文義魏水衡都尉漁陽太守生伯括機叔括

季括機字仲括太學博士臨江樂安二郡太守生羣
瓌密楷越楷字雄方晉治書侍御史避趙王倫之難
徙居常山五子輯晃芬勁叡叡子勗兄弟居巷東勁
子盛兄弟居巷西故叡為東祖芬與弟勁共稱西祖
輯與弟晃共稱南祖自楷徙居平棘南通號平棘李
氏輯字護宗高密太守子慎敦居柏人子孫甚微與
晃南徙故壘故輯晃皆稱南祖晃字仲黃鎮南府長
史生義字敬仲燕司空長史生吉字彥同東官舍人

吉生聰字小時尚書郎聰二子真融真字令才中書
侍郎融亦為後燕中書侍郎真生紹字嗣宗殷州別
駕紹生義深北齊行涼州刺史義深生駒駮隋絳州
長史三子政藻政起政期政藻宣州長史生刑部侍
郎叔睿生楸道游道諧道游道相武后政期水部郎
中生素立開州刺史高邑平侯素立生休烈鄭令休
烈生鵬字志遠壁州刺史鵬生奮字玉田考功郎中
奮生承山南東道節度使鵬弟升遠從遠希遠昌遠

希遠晉陽尉生揚州左司馬并并生岷規覲觀觀岷
廬江令生固言字仲樞相文宗燕司空長史羲後有
萬安自趙郡徙管城生項項生日知相中宗南祖之
後有善權後魏譙郡太守徙居譙生延觀徐梁二州
刺史延觀生續馬頭太守續生顯達隋潁州刺史顯
達生遷德州刺史遷生孝卿穀州治中三子敬玄忱
元素敬玄相唐高宗忱生欽一
案唐世系表忱生
欽一作悅字欽一元
素相武后敬玄生思冲工部侍郎守一成都郫令守

一生晤金壇令晤生紳字公垂相武宗所謂短李東
祖獻字幼黃高平太守江陵寧公生勉字景賢頓丘
太守大中正生頤字彥祖高陽太守武安公四子總
系奉曾總字少同蘭陵太守生靈及均均字善德後
魏趙郡太守生璨璨生元茂宣茂宣茂後魏幽州刺
史生籍之志之籍之字修遠司徒詔議參軍生徹徹
生純及公緒公緒字穆叔後魏冀州司馬棄官賜號
潛居公生少連少連生守冲守元守素守素唐秦府

學士天策兵曹參軍系字和叔後魏平棘男生順字
德正四部尚書高平宣王生式字景則濮陽侯式生
憲字仲軌揚州刺史濮陽文靖伯生希遠希宗希仁
希騫希禮希騫後魏黃門侍郎文惠公生元卿仲卿
仲卿生文琬文立文政仲卿為中山王開府諮議政為號
州司馬生思過思慎晉客晉客司農卿元氏縣男生
正悌正簡正簡唐司農卿生崗武城令崗生長倩元
善長裕長倩生絳

紫唐書本傳絳乃元善
子此作長倩子不合

字深之相

憲宗生璆項璋璋字重禮宣歙觀察使希禮字景節
北齊信州刺史文公生孝正孝基孝基隋晉王文學
生野王東王野王東郡功曹生襄城令鎮惡鎮惡生
侶僑侶台州司法參軍嶠字巨山相武后生暢裕榮
懿皆太守刺史東祖之後又有諤隋南和公生左金
吾衛將軍奕奕生太子中允震震生鄂州司馬光朝
光朝生鹽鐵判官仲塾仲塾生珏字待價相文宗西
祖勁字少黃晉治書侍御史二子盛隆盛中書侍郎

生纘襲纘字緯業太子祭酒生延休延字紹元後魏
假趙郡守生建連龜連曾孫搏固始令生惠明惠明
生新政令大智大智生尚一尚正尚入入字尚真中
山正公所謂李下無蹊徑者其兄弟文章同為一集
謂之華萼集襲生閣閣生傑侔傑六世孫公敏生懷
遠相武后懷遠生景伯禮部侍郎景伯生彭年喬年
彭年吏部侍郎侔孫代和索唐世系表
代和作恃和代和孫趙州
長史彥宗生嗣真字承胄御史中丞知大夫事常山

昭子有傳盛弟隆後魏阜城令生謀幕令謀孫元稱
後魏廷尉元稱孫孝恭生懷柔懷宗懷宗生隋謁者
郎君逸君逸生肅然肅然生載載生栖筠字正一御
史大夫贊皇文獻公栖筠生吉甫字宏憲相憲宗吉
甫生德修德裕德修楚州刺史德裕字文饒相文宗
武宗生倚渾熿渾比部員外郎熿柳尉熿生因衡延
古因衡左補闕延古司勳員外郎 遼東李氏璣少
子齊趙相初居中山十三代孫寶字君長後漢元菟

都尉徙襄平生雄車騎長史生亮字威明原武令生
敏河內太守生信信生裔裔字宣伯晉司徒廣陸成
侯生固字萬基散騎侍郎生志字彥道陽平太守嗣
廣陸侯弟沉沉孫根後燕中書令生宣鄴郡守宣生
晉後魏汝南公晉生永太中大夫永生弼字景和後
周太師隴西武公生耀暉安衍綸晏椿耀隋開府邢
國公生寬隋梁州總管蒲山公寬生密字元邃一字
法主兵敗歸唐拜光祿卿邢國公密生右臺監察裏

行知古寬弟偉生燉煌公檀檀曾孫澄義成節度使
武威郡王生克寧衍後周太官伯真卿肅公生仲威
仲威孫成休生泌字長源相德宗七歲賦方圓動靜
嘗與肅宗同輦出人指之曰着黃者聖人着白者山
人諫德宗不廢太子封鄴侯五子絙高陵尉繁和州
刺史縉咸陽尉紘涪州刺史絢華州文學椿曾孫祖
先生元素字大朴戶部尚書 江夏李氏漢酒泉太
守護次子昭昭少子就後漢會稽太守高陽侯徙居

江夏平春六世孫式字景則東晉侍中生疑疑生尚
字茂仲生矩字茂約江州刺史生充字宏度中書侍
郎生顥郡舉孝廉七世孫元哲徙居廣陵生善昉善
蘭臺郎熹文選學人謂之書籬生邕字泰和北海太
守工文章天下謂之李北海昉生璞璞生瑄起居郎
生鄆鄆字建侯相憲宗以吐突承璀所薦恥之辭
相位去生拭起居舍人拭生礪字景望相昭宗即劉
崇龜掠白麻誣沮之而不得者礪生沉字東濟 漢

中李氏漢東郡太守太常卿武孫頡後漢博士始居
漢中南鄭生郃字孟節司徒知二星向蜀者郃生固
字子堅太尉三子基字憲公慈字季公燮字德公燮
安平相十二世孫德林隋內史安平公生百藥唐禮
部侍郎宗正卿安平文公百藥生安期相高宗安期
生宗師宗臣宗元宗墨 柳城李氏二族其一世為
契丹酋長後徙京兆萬年令節曾孫光弼太尉侍中
臨淮郡王其一本奚族不知其氏至寶臣為張瑱高

養子冒姓張氏後賜姓李為司空清河王 略陽李氏出自廩君之後世居邑西宕渠漢末大亂遷於漢中楊車坂為百姓害號楊車邑至將軍武始歸於魏遷略陽北土復號巴氏武生東羌獵將慕慕生輔特驤庠流輔驍騎大將軍特字元休宣威將軍長樂鄉侯以子雄僭位追謚景帝廟號始祖驤驍騎將軍以子壽僭位追謚獻帝庠字元序威寇將軍楊泉亭侯流字元通秦文王特三子始武威將軍蕩驍騎將軍

雄字仲雋位前將軍僭即帝位國號蜀在位三十六年謚曰武帝廟號太宗以兄子班嗣蕩五子班玲稚珩都班字世文襲位一年而雄之子期戕之於殯宮玲中領軍稚將軍皆死於氏賊珩棄涪城奔晉都為中宗所殺仲雋四子越期霸保越建寧王相國大將軍錄尚書事期字世運弒班而自立在位三年驤子壽廢之為邛都縣公謚曰幽霸保皆不病而死驤子壽字武考襲廢期而自立在位五年謚昭文皇帝廟

號中宗三子勢廣福勢字子仁嗣父位五年而國亡
晉封之為歸義侯廣大將軍漢王坐求為太弟貶臨
邛侯自殺壽養弟攸安北將軍流子世位將軍又李
庠妹夫西夷校尉含生二子國太宰離太尉含弟胡
將軍又有陰平令李遠將軍李恭大將軍李傳廣漢
太守李超陳倉令李武大將軍李濤司空李璜司徒
李雲漢嘉太守李乾侍中李豔大將軍李基又李壽
瓜牙李閔鎮東大將軍李奕又尚書僕射武陵公載

謀反下獄死越雋太守釗李雄待遇甚厚朝議皆決
之又羅尚西南夷校尉李毅又李特征西將軍遐皆
為李壽所殺越雋太守李演自郡上書勸壽歸正反
本釋帝稱王壽怒殺之左僕射李嶷數以立言忤旨
壽亦殺之 雞田李氏本河曲部落稽阿跌之族至
光進賜姓李氏光進節度使光顏守司徒兼侍中
武威李氏見上平聲安氏 代北李氏出自沙陀見
上平聲朱耶氏 高麗李氏正已為三公有傳及表

范陽李氏自云常山愍王之後載義守太保范陽

節度使 渤海李氏靺鞨人茹常為朔方部將以戰

多賜姓更名嘉慶其子懷光為朔方帥位三公以反

誅李氏有董秦者幽州薊人自史思明賊中冒圍歸

李光弼召至京師賜姓李名忠臣檢校司空平章事

西域李氏唐乾元元年西域匿識國王訖俱設伊俱

鼻施案通考作統設伊俱鼻施來朝此多一俱字來朝賜姓李氏 河南

李氏後魏官氏志有叱李氏改為李氏西京雜記有

李廓諫濟陰王興居反又李黎一生一男一女以前
生者為長又茂陵少年李亨養鷹狗皆為佳名同州
蒲城人郭子和及其弟子政子端子升歸唐賜姓李
氏婺州刺史夷國公



欽定四庫全書

子部

古今姓氏書辨證卷二十二
三

詳校官中書臣沈鳳輝

侍讀臣孫球覆勘

謄錄監生臣單可立

謄錄監生臣溫廷鑑

欽定四庫全書

古今姓氏書辨證卷二十二

宋 鄧名世 撰

六止下

理

出自皋陶之後歷虞夏商周世為大理以官命族為

氏

始

項羽傳秦將軍章邯使軍侯始成使羽注曰姓始名

成

士

出自祁姓帝堯之後劉累為夏御龍氏其孫商時徙
封為豕韋氏周武王時因封為唐氏成王時徙杜城
又為杜氏杜伯為周宣王大夫無罪見殺其子隰叔
奔晉生蔿字子輿為晉獻公士師朝無姦官國無敗
政因其有功命以官為士氏蔿生司空士穀蔿孫會
字季諡曰士武子生文子燮共子魴燮生宣子匄匄

生獻子鞅鞅生昭子吉射及臯夷魴字季生瓌裘其
族有獻子士富及士渥濁士弱士文伯士彌牟士丐
士茁士蒧漢魏間有交趾刺史士燮又左傳秦士雅
宋士平衛士榮皆其族唐李遠知選有王忠者被放
吏謬書其姓為士忠遠曰調者三萬無士姓此必王
忠吏叩頭服罪詳此乃當時調者無士氏非謂天下
無士氏也

俟

風俗通古賢人侯子漢藝文志有侯子一篇李奇注
曰或作侔子此必侯氏也

子

出自帝嚳次妃有娥氏之女曰簡狄姊妹三人行浴
於元丘水中見玄鳥墮卵簡狄吞之孕而生契契長
而佐禹治水有功帝舜命為司徒封於商姓子氏禮
緯曰以玄鳥生子故為氏焉史記褚先生曰子茲也
茲益大也宜從褚說契生昭明昭明生相土詩所謂

相土烈烈海外有截者生昌若昌若生曹圉曹圉生
冥為司空勤其官而水死冥生振振生微微生報丁
報丁生報乙報乙生報丙報丙生壬壬生壬生主祭
主祭生天乙是為成湯成湯伐夏吊民放桀于南巢
踐天子位生太丁外丙仲壬皆前卒湯崩立太丁之
子太甲是為太宗太甲生帝沃丁帝太庚太庚生帝
小甲帝雍巳帝太戊太戊為中宗中宗生帝仲丁帝
外壬帝河亶甲河亶甲生帝祖乙祖乙生帝祖辛帝沃

甲沃甲崩立祖辛之子祖丁祖丁崩立沃甲之子南庚
南庚崩立祖丁之子陽甲陽甲之弟曰帝盤庚帝小
辛帝小乙生帝武丁是為高宗高宗生帝祖庚帝祖甲
祖甲生帝廩辛帝庚丁庚丁生帝武乙武乙生帝太
丁太丁生帝乙乙生帝辛是為紂紂不道周武王誅之立
其子武庚祿父為諸侯以續商祀武庚挾三監以叛
成王誅之立帝乙之子微子啟為宋公奉成湯之祀
得用天子禮樂為二王之後作賓于王家微子卒弟

微仲行立微仲生宋公稽稽生丁公申申生湑公共
及煬公熙共生厲公鮒祀鮒祀生僖公舉舉生惠公
覲覲生哀公哀公生戴公戴公生武公司司空生
宣公力力以國授其弟穆公和和又以國授宣公之
子瑒公與夷華父督弑與夷迎穆公子馮于鄭而立
之是為莊公莊公生閔公捷及桓公禦說禦說生襄
公茲父茲父生成公王臣王臣生昭公杵臼及文公
鮑鮑生共公瑕瑕生平公成成生元公佐佐生景公

顯曼能以善言責躬而熒惑退舍及卒公子特殺太

子而自立是為昭公昭公生悼公由

按宋悼公名購由此脫購字

由生休公田田生威公辟兵辟兵生剔成及宋君偃

齊湣王滅之又有黎國與宋同姓而蕭國出於宋皆

子姓也宋之子孫分為戴武桓穆莊之族其後為華

向皇樂魚蕩鱗仲孔褚師氏皆有譜而當時見於經

傳者曰子游昭公子公子穀生公孫鄭大司馬公孫

印公孫鍾離公子寅公子御戎公子朱公子固公孫

援公孫丁公孫忌又襄公之子曰司城須孫曰孔叔
文公之子曰公子圍龜字子靈平公之子曰太子痤
公子城成公之子曰公子周字子高昭公之弟曰啟
文公少子曰公子肥元公之弟曰母弟辰公子地莊
公之孫曰大司馬公孫固皆宋子姓又秦大夫子蒲
子虎楚大夫子彊子捷子駢子孟子貝宋大夫子韋
之類皆子姓也

梓

其先周官梓人之後以世官為氏春秋時魯大夫梓

慎

底

漢功臣表魯侯奚涓無子封母底為侯

案史記作母
疵漢書作底

然底乃名非氏也底氏
後亦無表見者疑誤

市南

元和姓纂曰楚有市南熊宜僚後以為氏按莊子以

宜僚為市南子

似先

高麗扶餘種也唐武德中有右驍衛將軍似先英問
又陳儒傳荆南監軍朱旼攻殺節度使段彥謩僖宗
遣中人似先元錫慰撫之又李訓傳訓嘗遣中人似
先希逸按邊

史華

元和姓纂云衛公子史食采于葉因氏馬左傳作史
華謹按魯閔公二年狄人囚史華龍滑與禮孔二人

曰我太史也則華禮皆氏龍滑與孔皆名華音去聲
非以葉為華也今以史華龍滑自分為兩人或曰姓
史華名龍滑皆誤矣

史晁

世本曰衛史晁之後謹按晁與朝通必史朝氏也

李蘭

代北複姓

士孫

春秋時齊大夫有士孫氏因所居名其里魯襄公二
十五年崔杼葬莊公于士孫之里是也漢博士平陵
侯士孫張至其孫灌津侯萌之子賢頴凡十世有譜
系唐有士孫瑞集十卷

士弱

元和姓纂曰晉士莊子弱為獄官晉人謂之士弱氏
按此左傳全文記當時語未必後世有此氏也

士丐

元和姓纂曰晉大夫士丐之後謹按春秋晉有二士
丐其一乃宣子而相士鞅逆齊侯于河者別一士丐
未知何人之後

士季

出自晉司空士蒍之後貞子士渥濁生莊子士弱弱
生士文伯瑕瑕生景伯彌牟別為士季氏

士貞

下一字仁宗廟諱嫌名姓源韻譜曰晉人謂之士貞氏

按此左傳全文記當時語未必後世有此氏也

子游

世本鄭穆公生子偃字子游之後謹按春秋鄭游氏
無子字

子有

元和姓纂曰魯有子字子有後見禮記宋有子有恭
叔今詳禮記無此事且依林氏存之

子夏

元和姓纂曰陳宣公生子夏後為氏誤矣謹按左傳此即夏氏春秋以來未嘗有子夏氏姓纂承襲久誤以夏為姒姓之後故指子夏為複姓今駁正之

子干

姓纂有氏無解謹按左傳楚公子比字子干嘗奔晉又歸楚自立棄疾脅之自殺後世必有以字為氏者

子羽

元和姓纂曰晉公族子羽後為楚邑大夫謹按左傳

衛鄭皆有行人子羽晉韓起庶子又有子羽今云晉公族必韓宣子之後以字為氏

子叔

出自姬姓衛公孫剽字子叔穆公少子也嘗為衛君謂之殤公生太子角其孫黑背以王父字為氏謂之子叔黑背春秋時魯大夫聲伯亦曰子叔嬰齊其後去子為叔氏

子家

出自姬姓魯莊公會孫歸父字子家其孫以王父字
為氏

子服

出自姬姓魯公族仲孫蔑之子佗別為子服氏諡懿
伯生子服惠伯椒椒生子服景伯何後有子服子伯

子國

世本曰鄭穆公生子國發發生子產僑簡成子僑生
子思參參生子玉珍武子珍生子樂卑顯莊子為子

國氏謹按春秋子產家止謂之國氏

子旗

齊惠公孫樂施字子旗鄭七穆氏豐施亦字子旗未
知何人之後為氏

子革

元和姓纂曰世本宋司城子革後又曰季平子支孫
為子革氏皆誤矣謹按春秋季氏無子革唯樂喜字
子罕為宋司城審此言則子罕氏非子革氏必欲存

此一氏宜改曰出自姬姓鄭穆公子子然生丹字子革
奔楚為右尹後人以為子革氏則近而有據

子臧

出自姬姓曹公子欣時字子臧遜國於負芻子孫以
王父字為氏

子車

秦大夫以王父字為氏春秋時其三子奄息仲行鍼
虎殉葬秦穆公國人哀其皆秦之良為賦黃鳥詩者

子駟

鄭穆公子駢字子駟之後鄭大夫有子駟德公見釋

例謹按春秋駟氏無子字釋例亦無子駟德公

子南

出自姬姓鄭穆公孫游氏之子曰楚字子南別為子

南氏又芊姓楚莊王子追舒字子南其後亦別為子

南氏

子占

世本曰陳威子占書書生子良堅堅子以王父字為氏

子師

出自鄭大夫子師僕之後漢有北平太守子師將石

子禽

陳僖子生惠子得為子禽氏按論語有陳子禽毀仲尼於子貢陳僖子相去未遠必僖子之子字子禽而其子若孫以王父字為氏

子木

出自芊姓楚平王太子建字子木為少師費無極所

譖王使人殺之建懼奔吳其子孫以字為氏

案楚別有令尹

子木

子皙

出自姬姓鄭穆公孫駟氏之子曰駟黑字子皙別以

字為子皙氏黑生印或云芊姓楚共王子公子黑字

子皙乾谿之難子干為君子皙為司馬棄疾殺子皙

其孫氏焉

子孔

世本曰鄭穆公生公子嘉字子孔之後謹按春秋有
二子孔司徒孔生公孫洩洩生孔張士子孔生子良
子人

出自姬姓鄭穆公之弟語字子人為大夫其孫九以
王父字為氏春秋鄭伯使子人九行成于晉是也

子士

世本曰魯叔孫成子生齊季為子士氏謹按左傳孟
僖子妾曰子士之母則子士乃孟僖子之後

子泉

世本曰齊頃公生子泉湫因氏馬左傳齊有大夫子

泉捷新序說同謹按春秋以泉為淵蓋淵泉通用

案淵

字為泉係
唐避諱改

子罕

世本曰鄭穆公子喜字子罕生子展舍之舍之生子

皮虎或作子軒氏春秋罕氏無子字

子蕩

元和姓纂曰世本宋桓公生子蕩因氏焉謹按春秋宋蕩氏亦無子字而宋大夫樂轡楚大夫屈罷皆字子蕩未知子蕩果誰後也

子午

元和姓纂曰世本楚公子午之後齊大夫子午明

子倪

英賢傳云子俛子齊人著書五篇論兵法與穰苴同
按此即俛氏不必為複姓解見子扁氏

子儀

左傳宋向魋之臣曰子儀克其先必以王父字為氏
如鄭君子儀楚申公鬬子儀之類

子西

出自芊姓楚平王子申字子西為楚令尹白公之難
子西死馬後世以王父字為氏

子寤

世本曰季平子生昭伯寤其後為子寤氏

子仲

謹按詩曰子仲之子娑娑其下則子仲陳國世族風俗通曰陳宣公子子仲之後以字為氏是矣

子郢

元和姓纂曰世本衛公族昭子郢之後按此必衛靈公之子郢也郢字子南

子石

世本曰陳威子生子石難自別為子石氏

子穆

世本曰陳僖子生子穆安因為子穆氏

子高

左傳衛大夫子高魴之後

子然

世本曰鄭穆公子子然之後謹按春秋七穆然氏無

子字他姓亦然

子乾

世本曰齊頃公子子乾之後以王父字為氏春秋時

有子乾皙

子期

出自芊姓楚平王子結字子期為大司馬白公勝作
難殺子期於朝後世以字為氏

子庚

芊姓楚令尹公子午字子庚其孫以王父字為氏

子囊

元和姓纂曰左傳齊大夫子囊帶之後

子公

世本曰齊頃公子子公之後謹按春秋鄭公子宋亦

字子公

子沮

世本曰陳烈子生子沮與後為子沮氏

子襄

世本曰齊桓公子子襄之後

子旅

周大夫氏悼王之入次于子旅是也

子季

世本曰楚公族子季氏

子成

世本曰魯季平子生子成叔彭侯之後

子扁

元和姓纂曰莊子有子扁子誤矣謹按莊子有扁子
一曰子扁慶子嘗與孫休言者其曰子扁子正如子
列子之類古者以子為男子通稱故弟子稱師名加
子於姓氏之上子列子子扁慶子是也姓纂如此類
皆誤收為複姓今馭去子字止存扁氏餘可槩見云
俟利

後魏匹孤之後其官曰俟利猶中國方伯也後以官

為氏

侯斤

謹按唐史突厥大臣曰侯斤世其官而無員限其先
世官者為侯斤氏後改為艾氏

侯亥

代北姓後魏獻帝次弟為侯亥氏

侯畿

代北侯畿氏後改為河南畿氏

侯奴

侯奴氏後改為侯氏

侯呂陵

後周太祖賜韓褒姓曰侯呂陵氏後改為呂氏

侯伏斤

後魏侯伏斤氏後改為伏氏

侯伏侯

侯伏侯氏改為侯氏

俟力伐

代北姓後改為河南鮑氏